

Građani moraju reći NE još jednoj godini bijede



Prepreke na putu Bosne i Hercegovine ka Evropi se mogu ukloniti prije oktobra, izjavio je visoki predstavnik i specijalni predstavnik EU na konferenciji danas.

«Ne prihvatom i mislim da niko u Bosni i Hercegovini ne bi trebao prihvatiti argument da se u 2010. godini ništa ne može uraditi zato što su u oktobru izbori», rekao je visoki predstavnik i specijalni predstavnik EU. «Neki ljudi ne razumiju da ne možemo jednostavno sjediti i ne raditi ništa i gledati kako se građane tjera da izdrže još jednu godinu ekonomske katastrofe i sve većeg siromaštva.»

Inzko je rekao da će «lideri koji pokažu da mogu djelovati efikasno kako bi riješili uzroke bijede u Bosni i Hercegovini *dobiti* glasove, a ne izgubiti ih.»

Visoki predstavnik i specijalni predstavnik EU odbacio je sugestije da je zamor od proširenja unutar EU potaknuo Brisel da primijeni strožije kriterije kada je u pitanju Bosna i Hercegovina.

Konstatirajući da je EU opredijeljen za članstvo Bosne i Hercegovine već deceniju, te da će svoju političku podršku poduprijeti finansijskom pomoći vrijednom gotovo 400 miliona eura tokom sljedeće dvije godine, on je rekao da reforme koje se navode u Evropskom partnerstvu i Sporazumu o stabilizaciji i pridruživanju nisu proizvoljne, ali «predstavljaju korake koji su donijeli stabilnost i prosperitet Evropskoj uniji i

koje su dovele do brzog unapređenja životnog standarda u novim državama članicama.»

Visoki predstavnik i specijalni predstavnik EU je rekao da je proces reformi «doveden do 'mrtve tačke'» jer politička elita ignoriše potrebe većine građana.

«Možda najzapanjujuće u trenutnoj krizi u Bosni i Hercegovini je to što izgleda da političari svoje dužnosti obavljaju potpuno ravnodušni prema katastrofama koje ih okružuju. Tokom 2009. godine, izgubljeno je 70.000 radnih mjesta pa ipak stranke i dalje odbijaju da usvoje zakonske propise kojim bi se otvarala nova radna mjesta. Mladi su prisiljeni da pohađaju škole kojima nedostaje finansijskih sredstava i univerzitete koji su korumpirani, pa ipak stranke i dalje odbijaju da usvoje zakonske propise koji bi pomogli da obrazovanje u BiH dostigne evropske standarde. Stotine hiljada građana nema odgovarajuću zdravstvenu zaštitu i sastavlja kraj s krajem živeći sa nekoliko stotina maraka mjesečno pa ipak stranke i dalje odbijaju da prilagode davanja iz budžeta kako bi najugroženije kategorije dobile barem neku vrstu pomoći na koju imaju pravo.»

On je rekao da je jedini način da se okonča «ova stravična neosjetljivost za patnju drugih» da se «političari natjeraju da plate cijenu za neuspjeh.»

«Potrebno nam je deset ili dvadeset ili trideset primjera političke volje koja se odjednom pojavila pod pritiskom energičnih zahtjeva građana kao što je to bilo u slučaju pitanja liberalizacije viznog režima», rekao je on. «Šta je s reformama koje će privući investicije i otvoriti nova radna mjesta; reformama koje će obnoviti obrazovni sistem i sistem zdravstvene zaštite i penzioni sistem i infrastrukturu u fizičkom smislu? Ukoliko politička elita ozbiljno namjerava da izađe pred izbornu tijelo u oktobru nakon što četiri godine nisu uradili ništa da bi riješili ova pitanja, onda bi trebali da plate cijenu.»

Visoki predstavnik i specijalni predstavnik EU govorio je na konferenciji o integraciji u EU koju su organizirali Centar za politiku i upravljanje i Fondacija Heinrich Boll na Univerzitetu u Sarajevu.

Puni tekst obraćanja visokog predstavnika/specijalnog predstavnika EU dostupan je na web stranicama www.ohr.int i www.eusrbih.eu